

Tillaga nr. 2 að

S A M Þ Y K K T **um búfjárhald á Akranesi.**

1. gr.

Samþykkt þessi er sett til að tryggja skipulag, stjórn og eftirlit með búfjárhaldi á Akranesi, koma í veg fyrir ágang á lóðir bæjarbúa og vernda gróður í landi kaupstaðarins. Samþykktin á einnig að tryggja að hús fyrir búpening, umhverfi þeirra og önnur aðstaða sé þrífaleg og í samræmi við lög um búfjárhald, forðagæslu o.fl. nr 103/2002, með síðari breytingum og ákvarðanir bæjarstjórnar á hverjum tíma.

2. gr.

Búfjárhald er óheimilt í Akraneskaupstað, nema með sérstöku leyfi bæjarstjórnar. Öll lausaganga búfjár í landi Akraneskaupstaðar er óheimil.

3. gr.

Sá sem hyggst sækja um leyfi til búfjárhalds skal senda skriflega umsókn til bæjarins. Í umsókninni skal gera grein fyrir tegund og fjölda búfjár, geymslu þess og öðru sem máli skiptir um öryggi þess og vörslu. Telji framkvæmdaráð að skilyrði fyrir leyfisveitingu séu fyrir hendi, veitir það leyfið. Leyfið má veita í tiltekinn tíma eða tiltaka ákveðinn frest til afturköllunar. Leyfið er háð gildandi samþykkt um búfjárhald á hverjum tíma og er gefið út á nafn og er ekki framseljanlegt.

4. gr.

Bæjarstjórn er heimilt að krefja umráðamann búfjár um kostnað sem hlýst af handsömun, fóðrun og hýsingu gripa, samanber 4. málsgrein 10. gr. laga númer 103/2002, sem og kostnaði við búfjárefirlit samkvæmt 11. gr. sömu laga.

5. gr.

Garðyrkjustjóri skal halda skrá yfir lönd sem úthlutað er til beitar og slægna. Umsóknum um land til grasnytja fyrir búfé skal koma til garðyrkjustjóra sem úthlutar leyfum, eftir umsögn umhverfisnefndar. Leyfin eru gefin út á nafn og eru óframseljanleg.

6. gr.

Enginn má halda búfé, nema hann hafi fyrir það hús sem samræmist kröfum opinberra yfirvalda. Sama gildir um allt umhverfi húsanna. Leyfishafi ber ábyrgð á því að hann hafi beutiland handa búfé sínu og fóður, svo og allri meðferð búfjárins. Leyfishafi búfjár ber einnig ábyrgð á að búfé hans valdi ekki tjóni eða óþrífum.

7. gr.

Hvað varðar umgengni á svæðum sem skipulögð eru fyrir búfjárhald og förgun á búfjárúrgangi vísast til reglna sem Heilbrigðiseftirlit Vesturlands setur. Ef

reglugerð HEV gengur á einhvern hátt lengra en samþykkt þessi, þá gildir reglugerð HEV.

8. gr.

Ef leyfishafi brýtur ákvæði í samþykkt þessari má afturkalla leyfið, enda hafi leyfishafi ekki sinnt áður veittri viðvörðun. Hvern þann búfénað sem sleppur úr vörslu skal taka hvar sem til hans næst og færa í örugga vörslu sem dýraeftirlitsmaður sér um. Eiganda skal tilkynnt um gripi sína og gert að sækja þá og greiða áfallinn kostnað, svo sem tjón og kostnað við handsömun. Hafi eigandi ekki hirt um að sækja gripi sína eða greiða áfallinn kostnað innan tíu daga, er heimilt að svipta viðkomandi leyfi til búfjárhalds á Akranesi. Við ítrekað brot á þessum reglum missir leyfishafi rétt til búfjárhalds.

9. gr.

Byggingar gripahúsa eru einungis leyfðar á svæðum sem skipulögð eru fyrir búfjárhald. Þau gripahús sem fyrir eru í bænum, á svæðum sem ætluð eru til annarra nota en búfjárhalds samkvæmt aðalskipulagi, skulu fjarlægð þegar bæjarráð samþykkir slíkt, með eins árs fyrirvara. Með öllu er óheimilt að byggja við þau, endurnýja eða endurbyggja, en gæta skal þess að þau líti vel út.

10. gr.

Einstaklingar og félög hesta- og fjáreigenda, sem hafa lönd í eigu bæjarins til grasnytja, skulu viðhalda gróðri landsins og efla hann, m.a. með árlegri áburðargjöf. Um beitolönd í eigu bæjarins skulu gilda sérstakar reglur og skal garðyrkjustjóri kynna búfjáreigendum þær og sjá til þess að þeim sé fylgt.

11. gr.

Brot á samþykkt þessari varðar sektum. Með mál út af brotum skal farið að hætti opinberra mála skv. 18. gr. laga um búfjárhald, forðagæslu o.fl. nr. 103/2002, með síðari breytingum.

12. gr.

Samþykkt þessi er sett með heimild í lögum nr. 103/2002, um búfjárhald, forðagæslu o.fl. ásamt síðari breytingum og öðlast þegar gildi. Jafnframt fellur úr gildi samþykkt um búfjárhald í Akraneskaupstað nr. 760/1999.